

ANG DIOS NAHIGUGMA SA IYANG MGA ANAK

Kini nga mensahe gituyo alang sa mga Santos sa Ulahing mga Adlaw kinsa nahasol sa pagkaibog sa sama og sekso ug usahay mawad-an og gana apan sinsero nga nagtinguha sa pagpakabuhi nga makapahimuot sa atong Amahan sa Langit.

Ikaw anak sa Dios, ug ang among mga kasingkasing nagtagad kanimo diha sa kainit ug pagbat. Sa walay pagtagad sa imong mga pagkaibog sa sama og sekso karon, mahimo ka nga magmalipayon niining kinabuhia, makapuyo og limpyo nga kinabuhia sa moral nga paagi, makahimo og makahuluganong serbisyo sa Simbahan, makatagamtam og hingpit nga pakigdait sa kaubang mga Santos, ug sa katapusan makadawat sa tanang mga panalangin sa kinabuhing dayon.

Ang propeta sa Basahon ni Mormon nga si Nephi misulti sa mga pagbat natong tanan sa dihang iyang giangkon nga siya wala "masayud sa kahulugan sa tanan nga mga butang." Apan siya mipamatuod, "Ako nasayud nga [ang Dios] nahigugma sa iyang mga anak" (1 Nephi 11:17). Ang Dios tino ud gayud nga nahigugma sa tanan Niyang mga Anak. Apan, daghang mga pangutana, lakip ang pipila nga kabahin sa mga pagkaibog sa sama og sekso, kinahanglan mohulat og tubag sa umaabot, bisan pa gani sa sunod kinabuhi. Apan ang Dios mipadayag og yano, dili mausab nga mga kamatuoran sa paggiya kanato. Iyang gihigugma ang tanan Niyang mga anak, ug tungod kay Siya nahigugma kanimo, ikaw makasalig Kaniya.

Ang Imong Pagka-ikaw ug Potensyal

Ikaw bililhon nga anak sa Dios. Dili lang kay nakaila ra siya sa imong pangalan; Siya nakaila gayud kanimo. Ang Iyang paghigugma kanimo linain. Nagpuyo ka sa Iyang presensya sa wala pa ikaw matawo dinihi sa yuta. Dili ka makahinumdom sa imong pakigrelasyon sa wala pa kining kinabuhia uban Kaniya, apan Siya makahinumdom. Bisan og ang Iyang mga anak usahay mohimo og mga butang nga makapasubo Kaniya, Siya kavnunay gayud nga naghigugma kanila.

Kon ikaw mahibalo kon sikinsa ka ug komportable diha sa pasalig nga ang Dios nahigugma kanimo, mas sayon nimong masabtan ang unsay gusto Niya alang kanimo. Siya gusto nga ikaw makadawat sa tanang mga panalangin sa kinabuhing dayon. Ang kinabuhing dayon nagpasabot og labaw pa sa taas o walay katapusang kinabuhi. Ang pag-angkon og kinabuhing dayon nagpasabot nga mamahimong sama sa Langitnong Amahan, nga magpuyo sama Kaniya, ug nga modawat sa kahingpitan sa kalipay. Makadawat ka og kinabuhing dayon kon ikaw mosunod sa sama nga mga balaod sa Dios ug mobuhat sa mga butang nga Iyang gipanghimo.

Ang Plano sa Kalipay

Ang Dios mihatag sa plano sa kaluwasan, o plano sa kalipay, aron sa pagtabang kanimo nga makadawat sa mga panalangin sa kinabuhing dayon. Kini nga plano gilatid diha sa mga kasulatan; ang mga tawo dili makausab niini aron sa pagpahaum sigun sa ilang mga gusto. Ang Dios lamang mayoy mohatag sa ganti nga kinabuhing dayon. Ang pipila sa mga pinakamahinungdanong mga panalangin nga gi-saad sa plano, lakin ang kinabuhing dayon, wala gituyo alang sa diha-diha nga pagtagamtam. Ang kahangturan taas, ug ang kinabuhi sa yuta kadiyora. Samtang ikaw mobase sa imong mga desisyon sa mahangturong mga baruganan imbis diha sa yutan-onng mga hagit o mga kagustohan, ikaw makaangkon og "kalinaw niini nga kalibutan, ug kinabuhi nga dayon diha sa kalibutan nga umaa-but" (D&P 59:23).

Kini nga mga panalangin nagbase sa pagkamasulondon sa mahangturon nga mga baruganan. Ang kamahinungdanon sa mga pamilya usa niini nga mga baruganan. Ang langit gi-organisar pinaagi sa mga pamilya, nga nagkinahanglan nga ang usa ka lalaki ug usa ka babaye duyog nga mogamit sa ilang mga gahum sa paglalang sulod sa mga utlanan nga gitakda sa Ginoo. Ang mga relasyon sa managsama og sekso wala nahisubay niini nga plano. Kon wala ang bana ug asawa wala usab unyay mahangturon nga pamilya ug walay kahigayunan nga mamahimong sama sa Langitnong Amahan.

Sa ubang mga sitwasyon ang usa ka tawo mounya-unya sa pagminyo tungod kay sa pagkakaron dili siya maibog sa usa ka sakop sa lain og sekso. Samtang daghang mga Santos sa



Ulahing mga Adlaw, pinaagi sa tagsa-tagsa nga paningkamot, sa pagbaton og hugot nga pagtuo, ug sa pagsalig sa gahum sa Pag-ula, makabuntog sa pagkaibog sa sama og sekso niining kinabuhia, ang uban mahimong padayon nga gihagit dinihi niining kinabuhia. Apan bisan pa man, ang perpetko nga plano sa atong Amahan sa Langit naghatag og kahigayunan alang sa tawo nga nagtinguha sa pagsunod sa Iyang mga kasugohan apan kinsa, dili tungod kay sala gayud kini nila, wala makaangkon og mahangturong kaminyoon niining mortal nga kinabuhi. Samtang kita mosunod sa plano sa Langitnong Amahan, ang atong mga lawas, mga pagbati, ug mga tinguha mahimong hingpit sa sunod kinabuhi aron ang matag usa sa mga anak sa Dios makakaplag og hingpit nga kalipay diha sa usa ka pamilya nga gilangkuban sa usa ka bana, usa ka asawa, ug mga anak.

Ang mga pagkaibog sa sama og sekso naglakip sa lawom nga emosyonal, sosyal, ug pisikal nga mga pagbati. Ang tanang mga anak sa Langitnong Amahan gusto nga mohigugma ug higugmaon, lakip ang daghang mga hamtong kinsa, sa nagkadaiyang mga rason, nagpabiling nag-inusara. Ang Dios mipasalig sa Iyang mga anak, lakip niadtong sa pagkakaron maibog sa mga tawo nga parehas niya og sekso, nga ang ilang matarung nga mga tinguha sa ngadto-ngadto hingpit nga matagbaw sa kaugalingong paagi sa Dios ug sumala sa Iyang panahon.

Kontrol sa Kaugalingon

Aron makasarang sa mga panalangin sa plano sa atong Langitnong Amahan, ang kada usa kanato gipadala dinihi sa yuta alang sa usa ka panahon sa pagsulay, diin atol niini kita mag-atubang og nagkadiiyang mga tintasyon ug mga hagit. Pipila niini nga mga hagit may kalabutan sa atong pisikal nga mga lawas. Tungod kay wala kitay pisikal nga mga lawas sa wala pa kining kinabuhia, kinahanglan kita nga makakat-on sa pag-puyo uban sa ilang mga kakulangan ug sa pagsabot sa ilang mga ipakita, mga kagustohan, ug mga panginahanglan. Ug angay kita nga moingon kanunay og “dili.” Kini nga pag-ila sa kaugalingon sa pisikal nga lawas mahinungdanon kaayo tungod kay kining mga lawasa atong maangkon, sa hingpit nga porma, sa sunod kinabuhi.

Ang atong mga lawas sagrado; gitawag sila usahay diha sa mga kasulatan isip “mga templo sa Dios.” Daghang mga tawo nga maibog sa sama og sekso nagrespeto sa kasagrado sa ilang mga lawas ug sa mga sumbanan nga gipahamtang sa Dios—nga ang sekswalidad mapakita “lamang tali sa lalaki ug babaye, kin-sa legal nga naminyo isip bana ug asawa” (“Ang Banay: Usa ka Pamahayag ngadto sa Kalibutan,” *Ensign*, Nob. 1995, 102). Ang mga kinabuhi niini nga mga tawo makapahimuot sa atong Amahan sa Langit. Ang pipila, hinoon, molapas sa utlanan ug mohimo og imoral nga mga binuhatan. Ang tinguha alang sa pisikal nga katagbawan wala maghatag og katungod sa pagka-imoral ni bisan kinsa.

Ang tinuod nga kalipay nag-agad sa labaw pa sa pagpadayag sa pisikal nga mga pagpang-aghat [urges]. Kini nga mga pagpang-aghat magkahinay kon daghang importanteng mga emosyonal nga mga panginahanglan matubag—sama sa panginahanglan sa pagbinayloay ug pagserbisyo sa uban. Ang tinuod nga kalipay nagagikan sa pagpugong sa kaugalingon, pagrespeto sa kaugalingon ug positibo nga direksyon sa kinabuhi. Kini nagagikan sa usa ka pagpamatuod sa tinuod nga doktrina—lakip ang kon si kinsa ka ug unsay imong dangatan—ug sa pagpuyo sumala sa plano sa kalipay sa Dios.

Daghang mga tawo nga maibog sa sama og sekso nga adunay lig-on ng mga pagpamatuod sa ebanghelyo ug, busa, dili manumbaling niini nga mga pagkaibog. Ang pagkaibog lamang dili makapahimo kanimo nga dili takus. Kon imong likayan ang imoral nga mga hunahuna og mga binuhatan, ikaw wala maka-sala bisan pa kon gibati nimo ang mao nga pagkaibog. Ang First Presidency namahayag, "Adunay kalainan tali sa imoral nga mga hunahuna ug mga pagbati ug sa pag-apil sa imoral nga pagpakighilawas kauban ang lain og sekso o bisan unsang sama og sekso nga pagpakighilawas" (sulat, Nob. 14, 1991).

Kini nga baruganan alang sa tanang mga anak sa Dios, kay Siya namahayag nga ang tanang pagpakighilawas gawas sa kaminyoon dili madawat. Ang matag usa adunay mga tintasyon, apan usa sa mga katuyoan sa pagkamortal mao ang pagkat-on sa pagbuntog niini. Si Presidente David O. McKay maayo kaayong mihulagway sa pagka-espirituhanon isip "ang pagkahibalo sa kadaugan batok sa kaugalingon" (sa Conference Report, Okt. 1969, 8). Kini nga mga tintasyon, nga sa kasagaran wala giimbitar, mahimong gamhanan, apan dili gayud sila kusog kaayo nga mahikawan kita sa atong kagawasan sa pagpili. Si Elder Dallin H. Oaks miingon, "Kitang tanan adunay mga pagbati nga wala nato pilia, apan ang ebanghelyo ni Jesukristo nagtudlo kanato nga aduna pa gihapon kitay gahum sa pagbatok ug pag-usab sa atong mga pagbati (sigun sa gikinahanglan) ug sa pagpasalig nga kini dili modala kanato sa pagtubay sa dili maayo nga mga hunahuna o sa paghimo og dautan nga mga binuhatan" ("Pagkaibog sa Sama og Sekso," *Ensign*, Okt. 1995, 9). Ang dili maayo nga mga hunahuna magkakunhod kon imo kining ilisan gilayon sa makapabayaw, makapalig-on nga mga hunahuna.

Sa imong tinguha sa pagkontrol sa kaugalingon, hinumdumi ang kamahinungdanon sa pagpuyo sa matarung nga paagi diha sa pribado ingon man diha sa publiko. Si Presidente Gordon B. Hinckley nag-awhag: "Ang atong batasan sa publiko kinahanglan dili masaway. Ang atong batasan sa pribado mas labaw pa nga importante. Kinahanglan kining mahisubay sa sumbanan nga gipahimutang sa Ginoo. Dili mahimo nga magpasagad kita sa sala, ilabi na ang pagsulay sa pagtabon sa atong mga sala" (sa Conference Report, Abr. 2002, 62–63; o *Ensign*, Mayo 2002, 52).



Kon nakalapas ka sa mga kasugoan sa Dios o sa imong mga pakigsaad, ikaw mahimong maghinulsol. Pinaagi sa Pag-ula, si Jesukristo mibayad sa bugti sa imong mga sala, ug ang Dios mopasaylo kanimo. Human sa imong hingpit ug sinstero nga paghinulsol, dili kinahanglan nga ikaw maglunang pa sa na-nagagi nga mga kasal-anan. Ang sugo sa Ginoo sa “pagpasaylo sa tanang mga tawo” naglakip sa kakinahanglanon sa pagpasaylo sa imong kaugalingon (tan-awa sa D&P 64:10).

Ang pagsabot sa mahangturon nga mga kamatuoran usa ka gamhanan nga makapadasig sa matarung nga mga batasan. Mas labaw ka nga makakaplag og kalampusan pinaagi sa pagtutok sa mga butang nga masabtan ug mapugngan nimo karon, dili mag-usik sa kusog o magpadako sa kapakyasan pinaagi sa pagkaguol kababin nianang mga butang nga wala pa hingpit ipadyag sa Dios. Paniguro sa pagpuyo sa yano nga mga kamatuoran sa ebanghelyo ni Jesukristo. Ang purohan nga maibog sa sama og sekso mahimong kusog kaayo, apan pinaagi sa hugot nga pagtuo sa Pag-ula ikaw makadawat sa gahum sa pagbatok sa tanang dili maayo nga binuhatan, magpabilin sa imong kinabuhi nga gawasnon gikan sa sala.

Pagpuno sa Imong Kinabuhi uban sa Pagkamaayo



Adunay tawo nga maalamong miiongong nga kon kita magtanom sa hardin og maayo nga binhi o liso, dili na kita manginahanglan pa kaayo og mga sarol o marik. Ingong usab, kon kita mopuno sa atong mga kinabuhi sa espirituhanong pag-amuma nga gihatag sa Dios, kita mas makahimo sa pagkontrolar sa mga tinguha ug mamahimong mga agalon sa atong mga kaugalingon. Nagpasabot kini sa paghimo og inad-law-adlaw nga positibo nga palibut diin ang Espiritu molungtad ug sa paglikay sa mga dapit nga adunay tintasyon, diin ang Espiritu masilo. Ang positibo nga palibot naglakip sa makanunayong pribado ug publiko nga pag-ampo, pag-simba, pagpuasa, pag-adto sa templo, pagserbisyo, pagbasa sa mga kasulatan, pag-ampo, pagpakig-urban sa buotan

nga mga higala, ug sa pagpakaita og tinguha sa makapabayaw nga mga basahon ug musika. Sa imong pagpaalirong sa imong kaugalingon niining mga butanga, ang imong hardin mamunga og maayo nga mga bunga ug makapalipay kanimo ug sa imong Amahan sa Langit. Ang kalipay maani gikan sa pag-ugmad sa maayo nga mga butang, dili lang kay sa pagpugong sa mga butang nga makapasilo sa Dios.

Usa ka importante kaayo nga paagi sa pagpuno sa imong espirituhanon nga hardin sa maayo nga mga liso mao ang aktibo nga pag-apil sa Simbahan. Bisan kon ang mga pagkaibog sa sama og sekso magpadayon ug mahimong mopabuhí sa wala pa masulbad nga mga pagbatí, ikaw malig-on pinaagi sa pagserbisyo sulod sa Simbahan ug pinaagi sa pagkig-urban sa ubang mga miyembro sa Simbahan kinsa sama nimo og pagtuo ug

nakahimo sa sama nga pakigsaad nga imong nahimo. Ang pagkalawat sa sakrament, ang pagkanta sa mga himno sa Zion, ug pagpaminaw sa makapadasig nga mga pakigpulong tanan makatampo sa imong espirituhanong pagtubo. Ang pagbali-wala niining maayo nga mga impluwensya ug ang pagpalayo sa Simbahan tungod sa pagkawagtang sa gana, paghunahuna nga ikaw gisalikway, o ang pagdahum nga ikaw dili bagay sa grupo makapadaot lamang sa imong pagkaespiruhanon ug sa imong tinguha sa pagkontrolar sa imong mga aksyon.

Ang ubang mga tawo mga maibog sa sama og seksyo mibati nga gisalikway tungod kay ang mga miyembro sa Simbahan wala mopakita kanunay og gugma. Ang mga miyembro sa Simbahan kinahanglan kanunay gayud nga magmatinagdanon. Samtang ikaw mopakita og gugma ug kabuotan ngadto sa uban, naghatag ka kanila og kahigayunan sa pag-usab sa ilang mga batasan ug mas hingpit pa nga makasunod kang Kristo.

Dugang pa sa pagpuno sa imong hardin sa maayo nga mga impluwensya, kinahanglan usab nimong likayan ang bisan unsang impluwensya nga makadaot sa imong pagkaespiruhanon. Usa niining makadaot nga mga impluwensya mao ang pagpunay og hunahuna o paghambin diha sa hunahuna sa binayot o tinomboy nga mga hunahuna ug mga pagbat. Dili makatabang ang pagpakita o pagladlad sa homosekswal nga mga linihokan o paghimo niini nga hilisgutanan sa wala kinahanglana nga obserbasyon o panaghisgot. Mas maayo nga pilihan isip mga higala kadong dili mopakita sa publiko sa ilang homosekswal nga mga pagbat. Ang mabinantayong pagpili sa mga higala ug mga magtutudlo kinsa nagpuyo og makapaligion, matarung nga mga kinabuhi maoy usa sa pinakaimportante nga mga lakang ngadto sa pagkamabungahon ug pagkamahiyason. Ang pakig-uban niadtong sama og sekso natural ug maayo, basta magbutang ka og kinutuban aron malikayan ang dili husto ug dili maayo nga emosyonal nga

pagbati, nga sa ngadto-ngadto moresulta sa pisikal ug sekswal nga kasuod. Adunay moral nga risgo sa pagbaton og sobra ka suod nga relasyon sa usa ka amigo nga sama og sekso kay kini mahimong mosangko ngadto sa mga bisyo nga gikondinar sa Ginoo. Ang atong pinakaimportante nga mga pakigrelasyon mao ang sa atong kaugalingong mga pamilya tungod kay ang atong relasyon kanila mahimong mohantud.

Ang pagkadesperado usa ka laing dili maayo nga impluwensya. Sagad kini moresulta gikan sa kakulang sa pagsabot ug pagsalig sa nagpadayon nga gugma sa Dios ingon sa gihatag pi-naagi sa gahum sa Pag-ula. Ikaw makakita og paglaum sa kama-tuoran nga ang matag panalanganin nga nahimong posible sa plano sa kalipay sa Langitnong Amahan nagpabilng anaa alang sa matag usa sa Iyang mga anak. Ang pagkadesperado ug pag-duda mahimong mosangko ngadto sa pagbiya, pagpangita og sayop, ug pagkawalay pasensya nga ang tanang mga tubag ug mga kasulabaran sa mga problema sa kinabuhi dili diha-diha dayon nga moabot. Ang Espiritu sa Dios nagdala og maayong pagbati ug kalipay. Salig sa Ginoo. Ayaw basula si bisan kinsa—dili ang imong kaugalingon, dili ang imong mga ginikanan, dili ang Dios—alang sa problema nga wala kaayo mahisabti niining kinabuhia.

Ang pornografiya, sa tanan niining malinglahon ug makapalaglag nga mga porma, talagsaon nga makadaot, makuyaw, ug makapaadik nga impluwensya. Ang mga hulagway diin ang imong hunahuna maladlad, bisan pa sa makadiyot lamang, marekord ug motanyag sa ilang kaugalingon sa panahon sa kahuyang aron sa pagguba sa imong panghunahuna. Ang matarung nga mga binuhatan moresulta sa kaputli sa hunahuna, nga gidasig pinaagi sa makapabayaw nga mga basahon, pag-isitoryahanay, musika, ug uban pang medya.

Ang ubang mga tawo naabusohan sa gagmay pa sila o naka-himo og sekwal nga pagsulay-sulay sa bata pa sila. Kon kini na-hitabo kanimo, palihug sabta nga ang pag-abuso sa uban o mga

kasinatian sa pagkabata angay nga dili momugna og pagbati nga sad-an ka karon, dili takus, o gisalikway sa Dios o sa Iyang Simbahan. Ang inosente nga pagkasipat sa bata pa ang tawo dili mo-impluwensya sa usa ka batan-on ngadto sa pagkaibog sa sama og sekso sama sa usa ka hamtong.

Labaw ka nga magmalampuson sa pagdumala sa imong kinabuhi samtang ikaw kanunay nga moamuma sa imong espiritu. Ang paglikay sa pagka-on sulod sa dugayng panahon, sundan sa sobra kaayo ka daghan nga pagka-on, dili makapatunhay sa maayong panglawas. Sa samang paagi, ang panagsa nga pagpakaon sa imong espiritu, bisan kon dinaghan, dili parehas og resulta sa kanunay, inadlaw-adlaw nga pag-atiman sa imong espiritu.



“Padayon”

Si Presidente Gordon B. Hinckley nagsaad nga kadtong mai-bog sa sama og sekso nga dili mopakita niini nga mga hilig “mopadayon sama sa ubang mga miyembro sa Simbahan” (“What Are People Asking about Us?” *Ensign*, Nob. 1998, 71). Kon ikaw mosunod sa mga sumbanan nga gipahamtang sa Dios ug mopuno sa imong mga adlaw sa maayo nga mga butang, ang imong kinabuhi mapuno sa paglaum ug ikaw makapaabot og mga kahigayunan sa makahuluganon nga pagserbisyo, pag-apil sa sosyal nga mga kalihokan, ug espirituhanong pagtubo niining kinabuhia.

Makatabang ang pagbisita sa imong bishop ug ubang mga lider sa priesthood kinsa naghupot sa mga yawe sa dinasig nga tambag alang sa mga miyembro sa inyong lokal nga yunit sa Simbahan. Kon moduol ka nila sa mapainubsanon ug matinuron nga paagi, sila mohatag sa ilang kaugalingon diha sa kalooy ug paghigugma samtang sila motambag kanimo. Ang Unang Kapangulohan namahayag: “Kami nag-awhag sa mga lider ug mga miyembro sa Simbahan sa pagtabang uban sa paghigugma ug pagsabot niadtong nagkalisud niining mga butanga. Daghan ang mobalos sa Kristohanon nga gugma ug dinasig nga tambag” (sulat, Nob. 14, 1991). Sagad usab nga makatabang ang pagpan Mayo og giya gikan sa propesyonal nga mga magtatambag kinsa eksperyensado sa pakig-atubang sa mga isyu kabahin sa pagkaibog sa sama og sekso ug kansang tambag nahisubay sa mga pagtulun-an sa ebanghelyo.

Samtang ikaw mangayo og tabang sa uban, pagbantay nga dili ka magsalig na lang hinoon kanila alang sa imong espirituhanong kalig-on. Ang imong bishop ug ubang mga lider makatambag kanimo ug makatudlo sa tinuod nga mga baruganan sa plano sa Dios alang sa Iyang mga anak, apan sa katapusang makanunayong kalig-on nga imong gikinahanglan kinahanglan magagikan sa Ginoo samtang ikaw motugyan sa impluwensya sa Espiritu Santo ug magbaton og hugot nga pagtuo kang Jesukristo. Dinihi niini lamang adunay malungtaron nga

kasulbaran ug igo nga kalig-on sa pagpahilayo gikan sa mga binuhatan ug mga hunahuna nga dili makapahimuot sa Dios.

Ubay-ubay nga mga Santos sa Ulahing mga Adlaw nga adunay mga pagkaibog sa sama og sekso nga nagpadayon sa ilang mga kinabuhi pinaagi sa mabinantayong pagsunod sa mga sumbanan sa ebanghelyo, pagpaduol gayud sa Ginoo, ug pag-pangayo og eklesiyastikal ug propesyonal nga panabang kon gikinahanglan. Ang ilang mga kinabuhi puno ug makapatag-baw, ug sila mapasaligan nga ang tanang mga panalangin sa kinabuhing dayon sa katapusan maila.

Ang mga mga pagtulun-an sa ebanghelyo managlihi kaayo sa mga paagi ug mga pagtulun-an sa kalibutan sa daghang mga hilisgutan, lakip ang moral nga pamatasan. Kini nga mga kalain-nan resulta sa atong pagsabot sa gasa sa kinabuhing dayon nga giandam sa Langitnong Amahan alang kanato ug sa mga kondisyon nga gikinahanglan aron madawat kini. Walay tawo, o bisan kanus-a, ang dili maapil sa liyok sa gugma sa Dios o sa andam sa pagdawat nga mga bukton sa Iyang Simbahan, kay kitang tanan Iyang pinalanggang mga anak. Ingon sa gisulti ni Presidente Hinckley: "Ang atong mga kasingkasing bukas niadtong kinsa nakibisog sa mga pagbatí sa pagkaibog sa sama og sekso. Gihunumduman namo kamo atubangan sa Ginoo, misimpatiya kami kaninyo, gitagad namo kamo isip among mga igsoon" ("Stand Strong against the Wiles of the World," *Ensign*, Nob. 1995, 99).

ANG SIMBAHAN NI
JESUKRISTO
SA MGA SANTOS
SA ULAHING MGA ADLAW

© 2007 sa Intellectual Reserve, Inc.
Ang tanang mga katungod gigahin
Giimprinta sa Tinitpong Bansa sa Amerika
Pagtugot sa Iningles: 4/07
Pagtugot sa Iningles: 4/07
Hubad sa *God Loveth His Children*

